

OFFERYNNAU STATUDOL CYMRU

2018 No. 1179

Rheoliadau Iechyd Planhigion etc. (Ffioedd) (Cymru) 2018

RHAN 2

Ffioedd sy'n ymwneud ag iechyd planhigion

Ffioedd arolygu mewnforio

3.—(1) Mae'r rheoliad hwn yn gymwys mewn perthynas â llwyth o drydedd wlad sydd ar ffurf planhigion, cynhyrchion planhigion neu wrthrychau eraill o ddisgrifiad a bennir yng ngholofn 1 o'r tabl yn Atodlen 1 a restrir yn Atodlen 5 i Orchymyn 2018.

(2) Mae'r ffioedd a ganlyn yn daladwy gan fewnforiwr llwyth o drydedd wlad—

- (a) mewn cysylltiad â phob tystysgrif ffytoiechydol neu dystysgrif ffytoiechydol ar gyfer ailallforio sy'n mynd gyda'r llwyth, ffi o £9.71;
- (b) mewn cysylltiad â phob rhan o'r llwyth sydd ar ffurf planhigion, cynnyrch planhigion neu wrthrych arall o ddisgrifiad a bennir yng ngholofn 1 o'r tabl yn Atodlen 1 nad yw is-baragraff (c) yn gymwys iddi, y ffi a bennir yn y cofnod cyfatebol yng ngholofn 2 o'r tabl hwnnw;
- (c) mewn cysylltiad â phob rhan o'r llwyth sydd ar ffurf planhigion neu gynnyrch planhigion o ddisgrifiad a bennir yng ngholofn 1 o'r tabl yn Atodlen 2 ac sy'n tarddu o wlad a bennir yng ngholofn 2 o'r tabl hwnnw, y ffi a bennir yn y cofnod cyfatebol yng ngholofn 3 o'r tabl hwnnw;
- (d) pan fo arolygydd yn amau bod y llwyth wedi ei heintio â phla planhigion a reolir ac yn cymryd sampl o'r llwyth er mwyn cynnal profion labordy i gadarnhau pa un a yw'r pla yn bresennol ai peidio, ffi o £157.08 am bob sampl a brofir.

(3) Yn y rheoliad hwn—

- (a) mae i "pla planhigion a reolir" yr ystyr a roddir yn erthygl 32(7)(a) o Orchymyn 2018;
- (b) ystyr "llwyth o drydedd wlad" yw llwyth a gyflwynir i Gymru o drydedd wlad;
- (c) mae i "trydedd wlad" yr ystyr a roddir yn erthygl 2(1) o Orchymyn 2018.

Ffioedd awdurdodiad pasbort planhigion

4.—(1) Mae'r rheoliad hwn yn gymwys mewn perthynas ag awdurdodiad pasbort planhigion.

(2) Mae'r ffioedd a bennir yn y tabl yn Atodlen 3 yn daladwy mewn cysylltiad ag arolygiad ac unrhyw weithgareddau cysylltiedig a gynhelir—

- (a) mewn cysylltiad â chais am awdurdodiad pasbort planhigion;
- (b) at ddiben monitro a gydymffurfir ag unrhyw ofynion a osodir ar ddeiliad awdurdodiad pasbort planhigion.

(3) Mae'r ffioedd a bennir yng ngholofn 2 o'r tabl yn Atodlen 3 yn daladwy am bob cyfnod o 15 munud (neu ran o'r cyfnod hwnnw) a dreulir yn cynnal yr arolygiad ac unrhyw weithgareddau

cysylltiedig yn y fangre berthnasol, yn ddarostyngedig i'r isafswm ffioedd a bennir yn y cofnodion cyfatebol yng ngholofn 3 o'r tabl hwnnw.

(4) Mae ffi ychwanegol o £18.78 yn daladwy pan fo person yn cyflwyno cais ar bapur (ac nid ar-lein) am awdurdodiad pasbort planhigion.

(5) Mae unrhyw ffioedd sy'n daladwy o dan y rheoliad hwn yn daladwy gan y person sy'n gwneud cais am awdurdodiad pasbort planhigion neu gan ddeiliad awdurdodiad pasbort planhigion (yn ôl y digwydd).

(6) Yn y rheoliad hwn—

- (a) ystyr “awdurdodiad pasbort planhigion” yw awdurdodiad i ddyroddi pasbortau planhigion a roddir o dan erthygl 29 o Orchymyn 2018;
- (b) ystyr “mangre berthnasol”, mewn perthynas â chais am awdurdodiad pasbort planhigion neu ag awdurdodiad pasbort planhigion, yw'r fangre sy'n destun y cais neu'r awdurdodiad.

Ffioedd trwydded ieched planhigion

5.—(1) Mae'r ffioedd a bennir yn y tabl yn Atodlen 4 yn daladwy mewn cysylltiad ag—

- (a) cais am drwydded;
- (b) unrhyw weithgaredd arall a bennir yng ngholofn 1 o'r tabl hwnnw a gynhelir mewn cysylltiad â thrwydded.

(2) Swm unrhyw ffi sy'n daladwy mewn cysylltiad â chais am drwydded neu unrhyw weithgaredd arall a bennir yng ngholofn 1 o'r tabl yn Atodlen 4 yw'r swm a bennir yn y cofnod cyfatebol yng ngholofn 3 o'r tabl hwnnw, y'i canfyddir yn unol â'r cofnodion mewn cysylltiad â'r gwasanaeth hwnnw (os oes rhai) yng ngholofn 2 o'r tabl hwnnw.

(3) Mae'r ffi sy'n daladwy mewn cysylltiad â monitro telerau ac amodau'r drwydded yn daladwy am bob cyfnod o 15 munud (neu ran o'r cyfnod hwnnw) a dreulir yn cynnal yr arolygiad ac unrhyw weithgareddau cysylltiedig yn y fangre sy'n ddarostyngedig i'r drwydded, yn ddarostyngedig i'r isafswm ffioedd a bennir.

(4) Mae unrhyw ffi sy'n daladwy o dan y rheoliad hwn yn daladwy gan y person sy'n cyflwyno cais am drwydded neu ddeiliad y drwydded (yn ôl y digwydd).

(5) Yn y rheoliad hwn, ystyr “trwydded” yw trwydded a ddisgrifir yn erthygl 40 neu 41 o Orchymyn 2018.

Tatws sy'n tarddu o'r Aifft: ffi

6.—(1) Pan fo arolygydd yn cymryd sampl o datws sy'n tarddu o'r Aifft er mwyn canfod, at ddibenion paragraff 5 o'r Atodiad i'r Penderfyniad, pa un a yw'r tatws hynny wedi eu heintio â *Ralstonia solanacearum* (Smith) Yabuuchi et al., rhaid i'r mewnoforiwr dalu ffi o £60.40 mewn cysylltiad â phob lot a samplir.

(2) Ym mharagraff (1), ystyr “y Penderfyniad” yw Penderfyniad Gweithredu'r Comisiwn 2011/787/EU sy'n awdurdodi dros dro Aelod Wladwriaethau i gymryd camau brys i atal lledaeniad *Ralstonia solanacearum* (Smith) Yabuuchi et al. o ran yr Aifft(1).

Tatws sy'n tarddu o Libanus: ffi

7.—(1) Pan fo arolygydd yn cymryd sampl o datws sy'n tarddu o Libanus er mwyn canfod, at ddibenion Erthygl 4 o'r Penderfyniad, pa un a yw'r tatws hynny wedi eu heintio ag is-rywogaethau

Clavibacter michiganensis (Spieckerann a Kotthoff) Davis et al., rhaid i'r mewnofiwr dalu ffi o £60.40 mewn cysylltiad â phob lot a samplir.

(2) Ym mharagraff (1), ystyr “y Penderfyniad” yw Penderfyniad Gweithredu'r Comisiwn 2013/413/EU sy'n awdurdodi Aelod Wladwriaethau i ddarparu ar gyfer rhanddirymadau rhag darpariaethau penodol Cyfarwyddeb y Cyngor [2000/29/EC](#) mewn cysylltiad â thatws, ac eithrio tatws a fwriedir ar gyfer eu plannu, sy'n tarddu o ranbarthau Akkar a Bekaa, Libanus(2).

(2) OJ Rhif L 205, 1.8.2013, t. 13, fel y'i diwygiwyd gan Benderfyniad Gweithredu'r Comisiwn (EU) 2015/2057 (OJ Rhif L 300, 17.11.2015, t. 43).